

19 MAI
RUGACIUNEA
SF. CUVIOS
CORNELIU DE LA KOMEL

Молитва

О священная главо, земный ангеле, небесный человеце, великий чудотворче, преподобне отче Корнилие! К тебе с верою и любовию усердно прибегающе, умиленно просим тя, небеснаго предстателя нашего: яви нам, смиренным и грешным, любовь твою отеческую и многомогущное твое заступление; се бо, грех ради наших, не дерзаем с свободою чад Божиих просити Господа и Владыку нашего о нужных нам на потребу, но тебе молитвенника к нему благоприятнаго предлагаем, верующе несомненно, яко вся благая можеши нам испросити у благости Его, аще токмо восхощеши.

Испроси убо нам, угодниче Божий, у Всещедрого и Человеколюбца Бога, веру праву, благочестие непоколебимое, покаяние совершенное, жития исправление решительное: да прочее не прогневаем Господа нарушением святых Его

заповедей и сподобимся прощения грехов наших от Него получить.

Умоли, чудотворче святой, даровати мир и благоустроение стране нашей Российской, здравие же, спасение и на враги одоление.

Умоли Бога: страждущую страну Российскую от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш. Яко да познают вси противляющиеся, яко с нами Бог и святии угодники Его.

Сохрани, святче Божий, молитвами твоими Церковь Христову от ересей и расколов, суеверия и неверия человеческого: да цветет в ней святое православие во всей силе и приносит плоды спасительныя душам.

Соблюди от всякаго зла и обитель тобою созданную, и вся живущия и подвижающияся в ней по твоим уставом: да целы и невредимы пребудут от искушений врага спасения человеческого.

Призри милостивно и на предстоящия раце мощей твоих и молящияся люди, иже в обитель твою приходят на поклонение, и вся прошения

их во благо исполни: болящим исцеление, скорбящим утешение, бедствующим вспоможение скоро подаждь. Всем же нам здравие душевное и телесное, земли плодоносие, тихое и богоугодное житие, благу христианскую кончину и добрый ответ на страшном Суде Христовом, у Всемилоствиваго Бога исходатайствуй, яко воистинну имеяй велие к Нему дерзновение.

Ей отче! Ве мы, яко много может молитва твоя пред лицем Вседержителя Господа: сего ради крепко на тя уповаем, и на твоя святая молитвы зело надеемся, яко ты приведеш нас предстательством твоим в небурное пристанище спасения, и наследники покажеш нас всесветлаго Царствия Христова.

Не посрами же, святе отче наш, упования нашего, и сподоби нас вкупе с тобою блаженства райскаго насладитися: да славим, хвалим и величаем великую милость к нам Человеколюбца Бога, Отца и Сына и Святаго Духа, и твое благое отеческое заступление, во веки веков. Аминь.